
БАҒДОД ТУМАНИДА ҲАШАР ЙЎЛИ БИЛАН 330 ЎРИНЛИ ЗАМОНАВИЙ МАКТАБ БАРПО ЭТИЛМОҚДА

Бағдод туманининг Қўғоли МФЙ ҳудудида 330 ўринга мўлжалланган янги замонавий мактаб биноси ҳашар йўли билан барпо этилмоқда. Кеча вилоят ҳокими Хайрулло Бозоров, вилоят секторлари раҳбарлари билан ушбу объектда бўлиб, қурилиш ишларининг бориши билан танишди.

Қишлоқ ёшлари шу ҳудуддаги 30-мактаб филиалида бошланғич таълимни олишгач, юқори синфларда ўқиш учун ҳар куни 4-5 км пиёда йўл босиб, қўшни қишлоқдаги мактабга қатнаган. Маҳаллий тадбиркорлар ва маҳалла аҳли бирлашиб, 11 йиллик мактаб қурилишини ҳашар йўли билан амалга оширишга киришишган.

“Очиқ бюджет” ахборот портали орқали фуқароларни бюджет жараёнига жалб қилиш механизмнинг ишга туширилиши ушбу лойиҳани ҳам амалга оширишни тезлаштирди. Маҳаллий бюджет маблағлари ҳисобидан мактаб қурилишига 900 миллион сўм ажратиб берилди.

Маҳалла аҳли ҳамда ҳашар ташаббускорлари билан мулоқот қилган вилоят раҳбари, мактабни тўла жиҳозлаш учун вилоят бюджетидан етарли маблағ ажратиб берилишини маълум қилди. Шунингдек вилоят ҳокимининг кўрсатмаси билан ўқув муассасасига спортзал қуриб бериладиган бўлди. Шунингдек, мактабни сув билан таъминлаш ҳам йўлга қўйилади.

Жорий йил март ойида ҳам туманнинг чекка ҳудуди Меҳнатобод қишлоғида 330 ўринга мўлжалланган янги мактаб биноси ҳашар йўли билан қуриб битказилганди.

Бизни ижтимоий тармоқларда кузатинг [Facebook](#),
2021-12-01 19:10:43